

Incumbensa da la fracziun da la PBD concernent la furma da la missiva per credits d'impegn sur 5 milliuns francs

En ils dus quints dal chantun 2016 e 2017 èn vegnidas suttamessas al cussegl grond per l'approvaziun dumondas da credits d'impegn da gronda impurtanza finanziaria. Las dumondas importavan 3,95 milliuns francs per construir in nov terminal da bus a Glion, 13,4 milliuns francs per la renovaziun da l'edifizi da scola dal Plantahof e 31,4 milliuns francs per ina sanaziun architectonica totala dal convict da la scola chantunala grischuna. Gia en la missiva tar il preventiv 2017 èn vegnids dumandads trais credits d'impegn tranter 0,865 e 5,9 milliuns francs. Per infurmar il cussegl grond e la publicitad ha servì ina missiva curta tar las singulas fatschentas. I po vegnir constatà che las dumondas da credits d'impegn fatgas da la regenza sur il quint annual e sur la missiva tar il preventiv èn cleramain s'augmentadas ils ultims onns.

Sco cumissiun predeliberanta è la cumissiun da gestiun (CdG) cumpetenta per tut las dumondas en questa furma. La CdG ha oravant tut l'incumbensa d'examinar ils aspects da la politica e da l'economia da finanzas. Tut ils auters aspects sco la necessitad e la cumparegliaziun da variantas na pon pia vegnir discutadas en nagina cumissiun. Cun la moda numnada da far ina dumonda vegn ina discussiun politica reducida ad in minimum.

Nus incumbensain la regenza d'adattar la basa legala uschia che credits d'impegn sur 5 milliuns francs ston vegnir suttamess obligatoricamain al cussegl grond cun ina missiva separada. Per predeliberar questas dumondas da credit sto vegnir nominada ina cumissiun spezialisada.

Cuira, ils 30 d'avust 2018

Michael (Donat), Niggli-Mathis (Grüsch), Aebli, Bettinaglio, Buchli-Mannhart, Casty, Clalüna, Danuser, Ellemunter, Erhard, Grass, Gugelmann, Hardegger, Hefti, Hohl, Lamprecht, Loi, Müller (Susch), Papa, Tanner, Widmer (Favugn), Widmer-Spreiter (Cuira), Zanetti (Sent)